

K-Nalón desestima la nominación de los Premios de la Música.

L'Academia de la Música acaba facer públicu esta selmana la rellación d'artistes y grupos nominaos a los premios d'esti añu. Los nominaos nesta edición al meyor cantar n'asturianu son La Bandina, Esther Fonseca, el Colectivu de músicos pola Oficialidá y K-Nalón. Dende K-Nalón queremos facer publicu qu'anque tamos agradeciós pola nominación nun queremos formar parte de tales premios.

Consideramos positivu qu'alguien haiga puesto'l güeyu en nosotros, pero nun sería xustu pa nós, nin pal restu d'artistes que tamién podrien tar ente los finalistes.

La canción cola que tamos nominaos ye Dixebra, un cantar que forma parte del tributu-homenaxe que ventidos bandes asturianos fiximos al grupu Dixebra. Esti discu ta rexistrau na SGAE, pero K-Nalón nun lo ta, y esa ye la cuestión.

El nuestru grupu apuesta dende'l principiu pola llibre difusión de la música y la cultura, y nesi sen toles nuestres creaciones tienen llicencia Creative Commons del tipu:



Reconocimientu-Non comercial-Sin obres derivaes (3.0 España License)

Y ye ehí onde la nuesa filosofía choca colos planteamientos de la SGAE.

Respetamos a tolos grupos que formen parte de la SGAE, pero nosotros nun compartimos la política d'esta entidá y tamos totalmente escontra'l famosu CANON que graba'l preciu de muchos productos electrónicos. Polo que sería un actu hipócrita pola nuesa parte aceptar cualquier nominación fecha pola SGAE.

Ante ello, K-Nalón acaba mandar un comunicáu a esta entidá pa que nun cuenten con K-Nalón y reconsideren a los otros grupos que nun entraron como finalistes.

Polo que tenemos en conocimientu ye la primer vez que se plantea esta cuestión nos premios anuales de la Academia de la Música.